

Mbunda - Lombeleni Myaso - Praying WP Psalms 2017

Myaso 68:1 Omo Njambi akakatuka, akashandola vitozi vendi! Vaje vamuzinda vakatunda ku mesho endi!

Myaso 5:9,10 Vitozi vange kuvesi kwendeka vushunga, mukuyoya kwavo kwashe vashakezeka lika kunyongesa vanu, vimbunge vyavo vinashulu na makuli, co vakaseveleka vanu na majwi a vungumba. 10 Vanyanyamese nakuvahisa yove Njambi, matumbe avo avanyongese vakevo vavenya. Vashekele kulyala nove omwo kutuma kwa vuvi vwavo, omwo vanakutengulukila nakukulwisa.

Myaso 7:1,2 Yove Shukulu Kalunga Njambi yange, muli yove mukemwo njiwana kuvanda, njamene nakunjipatula kuli voshe vaje valinakunjisheka, 2 nga kuulingimo, co vanjitatuvula nakunjisanyozola vipuka-vipuka ngwe vindumba, co naumo wai anjamena.

Myaso 11:6 Ikeye akatumu tuhya twa lilungu mukwenyeka vaka-vuvi, nakuvahisa na lihunzi lya kwenyeka.

Myaso 18:2 Shukulu Kalunga ikeye muka-kunjinyunga, ikeye wapwa cimpaka cange cakukola. Njambi yange ikeye wapwa cishwamo cange, muli ikeye mukemwo munjitewela. Ikeye wapwa ntelo yange, muka-kunjamina nakunjinyunga mwamuvwa.

Myaso 18:14,17 Co ikeye washele mikili yendi nakushandola vitozi vendi, nakuhyahyata kwa mihyato wavashekele. 17 Wanjamnenene ku vitozi vange va nzili, na kuli voshe vaje vanjizindile, omwo vanjihyanene nzili.

Myaso 18:39 Omwo yove unanjana nzili yakulwa nzita nakufungulula vitozi vange.

Myaso 18:45 Kusimpa kwavo kulinakuhwa, co vakatunda mu vimpaka vyavo oku vajaja.

Myaso 18:48 nakunjamina ku vitozi vange. Yove Shukulu Kalunga njihyanese ku vitozi vange nakunjinyunga ku vaka-lwozi.

Myaso 23:3 Anjana mwonyo wauha. Anjtwamenene mu vingila vyakushungama, omwo ya lizina lyendi.

Myaso 27:11 Shukulu Kalunga njilongese vije viwushaka ngeci njivilinge, co njitwamenene mu ngila yakujeneka vushonde, omwo njili na vitozi vavangi.

Myaso 31:15 Mwa vushunga ngozi yove yakama, ije iwunatulikila vaje vaku-komoka ije iwunapangela vaje vavanda muli yove, ku mesho a vana va vanu!

Myaso 34:4 Njalombele kuli Shukulu Kalunga, co wanjikumbulwile, ikeye wanjipatwile ku lyova lyange lyoshe.

Myaso 34:7 Kangelo ka Shukulu Kalunga akanyungu vaje vakomoka Shukulu Kalunga, nakuvapatula ku vushonde.

Myaso 34:13 Munu wa cifwa cangacije kesi endeke vyavivi nambe kwendeka

makuli.

Myaso 34:17-19 Omo vaka-vushunga vatambeka, co Shukulu Kalunga avaziva, avamena ku tuyando twavo twoshe. 18 Shukulu Kalunga ali muyehi na vaje vanazeye mu vimbunge, ikeye amena vaje vanajeneka cinyangavili. 19 Tuyando twa muka-vushunga twapwa twatungi, oloni Shukulu Kalunga amwamena mu vyoshe.

Myaso 35:1-8,10 Shukulu Kalunga, yeluvisa vaje vanjiyeluwisa, co lwa na vaje vanjilwisa! 2 Ambata ntelo yakama neyi yaindondo, co katuka unjikwase. 3 Jundula likunga lyove na njaviti yove ali vaje vanjikavangeya. Njikulaese ngeci ukanjamina! 4 Voshe vaje vashaka kunjitsiya, vavafungulule nakuziva shwamwa! Voshe vaje vanjitumbila vutumbe vwakunjilwisa velwise munima nakuvaiya-iyisa! 5 Vapwe ngwe lijungu lyakupekumuka na lihunzi, omo kangelo ka Shukulu Kalunga avasheka! 6 Vingila vyavo vipwe vya lisusulungu nakuseneta, omo kangelo ka Shukulu Kalunga avapupa nakuvawisila asi! 7 Vananjitela mweto kwakujeneka mulonga, co vananjiindila mbulu yakulova ngeci vanjikwate. 8 Oloni vakanyonga vwasivwasi, co vakatsa mu linimbwa lyavo vavenya! Vakawila mu mbulu nakunyonga! 10 Njikendeka kuli Shukulu Kalunga na mbunge yange yoshe ngwange, “Kukwesi umo wakulifwa nove! Yove ukanyungu vaka-kuzeya kuli vaka-nzili, ukanyungu kautu kuli muka-kumuyandesa!”

Myaso 36:7-9 Mucavwaa cizemo cove Njambi, cizemo cije kucesi kutenguluka! Vanu valinakuvanda mu munzinze wa mambava ove. 8 Vakevo vakuta manene na vyakulya vyavingi vyakutunda kuli yove, yove ukavana vyuma vyavivwa vije viketi ngwe mema a mu ndonga. 9 Yove ukaana mwonyo ku vyuma vyoshe. Omo a ceke cove twasa kumona ceke.

Myaso 37:5 Kundika ngila yove kuli Shukulu Kalunga, kulaela kuli ikeye, co akakukwasa,

Myaso 37:23,24 Shukulu Kalunga akatwamenena munu mu ngila ije yanapande kwendelamo, co akanyungu vaje vamuvwasa. 24 Nga vawa, kakavecelela vakale asi embwe, omwo Shukulu Kalunga akavakwata na livoko lyendi.

Myaso 37:40 Shukulu Kalunga avakwasa nakuvamena, ikeye avamena ku vaka-vuvi, omwo vatewela kuli ikeye ngeci avanyunge.

Myaso 39:1 Njendekele ngwange, “Njikanyunga vingila vyange, co kunjikatavesa ndaka yange injilingise vuvi, kunjikendeka cuma cimo omo vaka-vuvi vali muyehi.”

Myaso 41:4 Njendekele ngwange, “Njizivileko mema ku mbunge yove Shukulu Kalunga, njikangwise omo njinavulumuna kuli yove!”

Myaso 42:5,11 Omwo vikajo njinaviilila? Mbunge yange vikajo inazeyela? Omwo vikajo njilinakulinyengela? Njikaka cinyangavili cange muli Njambi, co njikamushangazala lalo, muyoyesi wange, na Njambi yange. 11 Omwo vikajo njinaviilila? Omwo vikajo njilinakulinyengela? Njikaka cinyangavili cange muli Njambi, co njikamushangazala lalo, muyoyesi wange na Njambi yange.

(Myaso 43:5)

Myaso 43:1 Njisompele yove Njambi, nakunjakwila mulonga wange ku muyati wa kukomoka Njambi, njamene ku vaka-makuli na vaka-vuvi!

Myaso 44:4 Yove unapu u mwene yange na Njambi yange, yove ukahyanesa vanu vove.

Myaso 51:5 Kenga, vanjikitilile mu vuvi, na mu vuvi mukemwo muvanjimitilile vanana.

Myaso 52:5 Ngcivene, Njambi akakunyongesa ku myaka yoshe, ikeye akakwambata nakukukokela anja ya njuvo yove, co akakutundisa mu lifuti lya vaka-kuyoya.

Myaso 54:7 Unanjamina ku tuyando twange twoshe, co lisho lyange linamono muvanavafungulula vitozi vange.

Myaso 55:18 Ikeye akanjilwisa mwamuvwa ku nzita ije injilwa na vitozi vavangi manene.

Myaso 59:2 Njamene ku vanu vaka-vuvi, njamene kuli vaje vashaka kunjitsiya!

Myaso 60:12 Omwo tuli amo na Njambi tukahyana, ikeye akafungulula vitozi vetu.

Myaso 63:11 Mwene akawaelela muli Njambi, voshe vaje vanakulaela mu lizina lya Njambi vakajolela, oloni vaka-makuli vakoloka kuluu.

Myaso 66:3 Endekeni kuli Njambi ngweni, "Unalingi vyuma vyakukomokesa, nzili yove inapu yakama manene ngeci vitozi vove valiita kuli yove.

Myaso 68:6 Njambi akana njuvo yakukala kuli vaje vali avo lika, atundisa vinzinda nakuvavezikisa, oloni vaka-kumutengulukila vakakala mu mambo.

Myaso 68:35 Njambi ya Isalele wapwa wakukomokesa mu Njuvo yendi yakujela! Ikeye akana nzili ku vanu vendi. Shangazaleni Njambi!

Myaso 70:1 Njamene yove Njambi, zambula ngeci unjikwase, yove Shukulu Kalunga!

Myaso 71:4 Yove Njambi yange, njipatule ku livoko lya vaka-vuvi, nakunjitundisa ku livoko lya vaka-muuka na vaka-vuvi.

Myaso 71:13 Vaje voshe vashaka kunjilwisa vafungulule nakuvanyongesa! Vaje voshe vashaka kunjivulumuna, vazivise shwamwa.

Myaso 72:12 Apatula tuutu vaje vatambeka kuli ikeye, vaje voshe vanajeneka na vaje vavanayengula ikeye avapatula.

Myaso 76:12 Ikeye ononwesa vana va vimyene va kulyalesa, nakuzivisa lyova vimyene vakama.

Myaso 79:9 Tukwase nakutwamena yove Njambi, tupatule nakutusambesa, omwo lizina lyove.

Myaso 86:17 Njimwese vuvwa vvove Shukulu Kalunga, ngeci vaje vanjizinda vakazine shwamwa, omo vamona ngeci yove unanjikwasa nakunjizembeleka.

Myaso 91:14,15 Njambi nendeka ngwendi, "Njikamena vaje voshe vanjizema, nakunyunga vaje vanjizivuka ngeci yange nji Kalunga. 15 Omo vatambeka

kuli yange, co njivakumbulula omo vali mu tuyando, co njikakala amo navo. Njikavamena nakuvasingimika.

Myaso 92:11 Njinamono kufunguluka kwa vitozi vange, co njinazivi mitambi ya vaka-vuvi.

Myaso 103:10 Ikeye kesi kutuhisa ngwe ku vuvi vwetu embwe, nambe kutwilwisila vuvi vwetu ngwe ku milonga yetu.

Myaso 104:9 Yove watwile nginga ngeci mema kesi ajombokeo, ngeci ano asi kesi ajalele.

Myaso 107:6 Asinoni mu tuyando twavo, vatambekele kuli Shukulu Kalunga, co wavamenene ku tuyando twavo.

Myaso 118:10,12 Miyati yoshe vanjizengelekele, oloni mu lizina lya Shukulu Kalunga njavanyongesele! 12 Vanjizengelekele ngwe vimuka, oloni vwasi-vwasi vanyongele ngwe tuhya twenyeka mwila wakuma, mu lizina lya Shukulu Kalunga njavanyongesele.

Myaso 121:7,8 Shukulu Kalunga akakunyunga mwamuvwa ku vushonde vvoshe. 8 Shukulu Kalunga akakunyunga kwoshe-ikwoshe kuje kuukaya, kutunda ku lelo na ku myaka yoshe.

Myaso 138:3 Omo njalombelele kuli yove, co wanjikumbulwile, wanxitakamesele lalo na nzili yove.

Myaso 140:1,4,5 Njamene kuli vaka-vuvi Shukulu Kalunga, njinyunge kuli vaka-muuka. 4 Njinyunge kuli vanu va muuka Shukulu Kalunga, vanu vaje vatumba matumbe akunjinyongesa. 5 Vaka-kulyalesa vananjitela mweto, vanatanduvula mikole ngwe linimbwa, vananjitela myeto kumukulo wa ngila ngeci njitsemo.

Myaso 142:6 Tolilila ku lilombelo lyange ngeci unjikwase omwo yange njinazeye. Njamene ku vitozi vange, omwo vali na nzili ali yange.

Myaso 143:9 Shukulu Kalunga njipatule ku vitozi vange, njinatewela kuli yove ngeci unjishweke.

Myaso 147:14 Ikeye aana kwoloka kuluu ku vinginga vyove, nakukwana tiliku yaivwa ngeci ulye.

Myaso 149:6-9 Valisambe nakutambeka manene omo vashangazala Njambi, amo na mikwale yavo yakuvambuka mu mavoko avo, 7 mukufungulula nakuhisia miyati ya vanu, 8 kukuta vimyene vavo na malyenge, na vantwama vavo lalo na malyenge, 9 kuhisa miyati ya vanu ngwe kukushika kwa Njambi. Oku kukekwo kuhyanana kwa vanu va Njambi! Shangazaleni Shukulu Kalunga!